

四庫全書

集部

欽定四庫全書

滋溪文稿卷十二

元 蘇天爵 撰

碑誌

元故奉元路總管致仕工部尚書韓公神道碑銘

并序

延祐六年奉元路總管韓公引年謝事進官嘉議大夫
工部尚書將謀東歸士民共挽留之居歲餘公母弟漢

中廉訪使中遂亦請老乃相隨出關蓋公昆弟皆屢仕於闕輔風采惠愛流布遠邇於是長安士民聞之爭具酒肴相帥祖餞於東門外車馬塞途眷戀追攀不忍其去觀者感歎以為榮士論嘉其知止命工畫者寫其迹號二老出關圖以擬漢二疏云公既東歸往來汴衛之間以佚老焉至順元年冬天子親祀南郊禮成大賚四海公昆弟與賜金織紋錦四拜而受之三年九月十有七日公薨於汴享年八十有四贈通議大大禮部尚書

上輕車都尉南陽郡侯謚康靖廉訪先公一年年七十有九而卒海內以二公國之老成相繼淪逝咸悼惜焉公諱冲字進道少有立志涉獵文史鄉郡儒先咸器重之年十九挾其藝遊京師翰林學士徒單公履辟為書寫未幾擢戶部掾江淮初定北人除官者帥憚往詔陞二等公慨然請行進從仕郎太平路總管府經歷會詹事院立召公為掾尋除本院架閣庫管勾至元二十八年尚書省罷政事一歸中書太子詹事完澤位右丞相

素知公才擢工部主事久之遷承務郎陝西行省左右
司員外郎大德初元選為安西王相府郎中令又明年
進奉訓大夫六年遷奉議八年遷奉政郎中令如故十
年改朝列大夫知沔陽府陞中憲大夫峽州路總管未
上以便親養改汴梁稻田總管轉黃州路總管丁母夫
人憂延祐四年服闋移守奉元又二年始請老焉昔者
國家既定天下乃置官府以成庶功而軍旅章程食貨
刑獄繕作之事日以興矣必需刀筆簡牘記載施行世

之豪傑有用之士即羣而趨之方省部初立戶曹之治
錢穀工曹之治營造非通敏便給之材不足以當之公
持文墨論議皆有餘裕始佐外郡即以清慎著聞風紀
薦之遂優減其資歷及佐陝西省幕故贈咸寧貞憲王
為平章端嚴正大朝廷倚以為重公言溫而氣和平章
獨愛敬公闕輔自許文正公過化之後多士雲起或隱
伏閭里而弗自彰若韓公擇蕭公鄭同公恕鄭公中公
言於平章皆薦達而尊禮之文風翕然丕動公為政詳

明治獄有能迹先是六盤居民家奴數百指或怨其使
歲給衣食不均使有子方七歲殺之以快其忿反以誣
其他奴厯十餘年不決公讞之得實始置於理有中使
代祀秦蜀山川道出延安驛以馬不善馳命從者以革
帶繫館人耳懸於柱端撻之流血館人憾之俟中使還
宿驛中夜入扼其吭以死從者弗覺也明日有司疑盜
殺之盜竟弗獲按其從者誣服中書命公驗治乃呼其
衆告之曰中使過此曾虐汝乎衆驚曰獨嘗困苦一館

人耳公徐召其人訊之遂伏其辜而從者獲免臨洮富民無子有妾方娠妻妬而賣之二十餘年矣夫死官為主其家資忽一人臨喪哭曰我乃遺腹子也有司欲以家資予之公疑其詐物色於富民之家得佛書一帙背有書云某年月日妾有孕賣鞏昌某家公潛遣人求得之詢其歲月皆合郡人驚嘆以為神哭者坐以欺妄初世廟封皇子為安西王立王相府選儒臣傳之其子既嗣為王猶慎擇其僚屬公為郎中令凡四考朝廷重其

選故久之弗遷他官公識慮周遠內正輔導以成傳相之尊外盡謙恭以修藩國之禮輯宿衛俾不為暴均賜與俾不告勞王深敬禮沔陽官舍民廬初燬於火公至規畫有方完新如昔郡以網罟之利甲天下僑士游客挾貴勢而獵利於其府者無虛日擾政犯律未易枚舉至公一謝却之聽政而退門閭閤然每歲孟春湖官假貸富家預輸一歲之賦謂之給課及夏秋六水方始捕魚羨餘悉歸於已偶適歲稔詔弛山澤之利以賑民饑

湖官苦之公言行省請還其輸賦而後弛禁從之衆感其惠及公去官餽錢二萬五千貫公力却之嘗奉省檄錄囚信陽諸郡活寃者衆既而復命於省或問公曰沔陽湖波號稱陸海人言飲之者皆得盡量果如是耶公正色曰天厨之饌萃水陸之珍有敢染指者乎稻田官屬舊無公田竊官租以為養公白於朝賜田八千畝官屬至今賴之及奉元命下士民聞之無不相賀是郡壓於省憲往往弗克展布公聲名素著上下敬信期月之

間悌豈之政已洽於秦民矣有盜竊官帑弗獲執其主
藏吏坐之獄具公疑其冤弗署果獲真盜公性孝友偕
廉訪公事母夫人克盡孝養母卒表率子姪行古喪禮
縉紳範之季弟伸少有材能公推父澤與之後果官郡
縣有聲天厯初闕陝大饑民盡室以逃有故人子挈其
家抵公居數日及其母妻俱亡子疾亦殆公買棺葬之
撫其子益厚公所居必葺周植竹樹左右陳列圖史鼎
彝日以自娛表古人善言懿行遍疏屏間以為師法作

詩閒雅尚清致隸書圓勁有古法客至抵掌言笑泛及
經史客為忘歸公亦無倦不喜飲酒食必精潔平生不
妄飲食年八十餘神觀清明步履輕便蓋所養者厚完
斯其有以異於人也韓氏世居漁陽上谷遼金以來族
大而盛位列公侯將相富貴奕奕與劉亦符馬人望趙
思溫等號四十族昏姻門閥時人比唐崔盧公曾祖諱
王明昌五年登經義詞賦兩科進士第入翰林為應奉
文字卒官河平軍節度副使祖諱琇元光元年以材勇

應武舉授慶陽府司錄判官累遷昌武軍節度使金亡
始家於衛皇贈亞中大夫衛輝路總管考諱天麟國初
以明習法令厯官吏禮部員外郎兵部郎中累贈嘉議
大夫兵部尚書上輕車都尉南陽郡侯曾祖妣馮氏祖
妣王氏妣梁氏元配黃氏繼辛氏王氏梁氏黃氏並追
封南陽郡夫人辛氏封南陽郡太夫人子男二長汝霖
承事郎同知息州事轉內邱縣尹擢陝西行御史臺掾
次閏章早卒孫男二曰禔曰僖公以薨之歲十有一月

十有一日歸葬汲縣親仁鄉康公里天爵少侍家庭數
聞先公稱當代名公卿士每及公之昆弟及來關中又
聞士夫高年者尚能談公遺政會汝霖謀刻公治行於
墓之碑而以其辭見屬辭曰

金遼有國韓為世家將相蟬聯門闕輝華溫溫郎官家
聲日起法令為師廣平佐理篤生諸子皆賢而材伯也
翩翩名與衆偕出佐省曹長幕王相贊畫周詳士名所
望廉以律已冰蘖自持明以察冤炳若著龜久列闕輔

允著遺愛上書引年士民興慨鐘鳴漏盡或不知休貪
祿持寵實爾之羞維公伯仲風節奮厲進退雍容表儀
當世帝嘉其行寵錫褒章天益相之俾壽而康昔人有
言知止不殆爰述銘詩以勸有位

元故陝西諸道行御史臺治書侍御史贈集賢直

學士韓公神道碑銘

并序

世祖皇帝建立臺憲以肅紀綱以正風化其為國家治
安之計益深遠也賢才彬彬而列中外既久而猶賴之

以為世用若故治書侍御史韓公亦其一也初至元間
公以儒士明習法令擢察院掾尋辭去侍親於江南歷
十餘年不仕御史表其孝廉擢掾中臺遂除架閣庫同
管勾出為山東道廉訪司經歷憲使陳公天祥薦其才
召為籍田署丞遷司農司都事擢拜監察御史除陝西
行臺都事進內臺都事拜山東道廉訪副使轉淮東道
以養母辭歸母喪既終調湖廣行省左右司郎中改河
東道廉訪副使進拜漢中道廉訪使又遷陝西行臺治

書侍御史公自管勾凡十三遷其散階至中議大夫蓋
入官五十餘年終始不離風紀昔者臺憲建立之初本
以登崇俊良糾劾貪暴訓農興學輔世安民而已或者
矯亢以為高竒刻以為能是豈祖宗建官任人之意乎
當時進用大抵多老成忠厚之士故能作新憲度贊襄
隆平而至元大德以來仕者各盡官守言責朝野清簡
無事是豈偶然者哉公於其時承國家治安之餘踵諸
考步武之後所至奉法以公御史以肅俾善良獲伸徼

倖者無所免一時號稱賢部使者今考其行事而精神
心術之著尚得序而銘之以為來者之法焉公諱中字
大中資簡重寡言笑自少不妄交遊讀書惟務踐履初
掾中臺即著廉聲殆長山東幕府簿書品式無不中程
登萊告饑公承檄賑之民獲其惠司農所以訓農務藉
田所以供粢盛其播植之勤勸課之法朝廷必擇人如
公者居其職未嘗以散冗視之也公在六察言事尤切
井普地震居民壓死者衆當蠲賦稅以休其力江淮歲

凶民以男女質錢或者轉賣為奴當出錢贖之歸其父
母西域富商大賈居中土者當著版籍與民同應役
諸王所辟監郡監縣往往非才或父兄方官路府子姪
又列州縣上下締構蠶食其民當同守令三年遷轉仍
父子相避及不許需次官所內外諸司多假公營私日
乘急傳馬多走死驛戶困而流移當設法裁省其濫廷
臣多從其說公在憲府及佐行省用刑悉本哀矜嘗盛
暑治獄逮者數十人獄具分臺以聞事久未下公約其

人俾歸及期則至既已治罪羅拜而去京師之民有夫
死疑其妻殺之者獄十餘年不決公辨其誣釋之武昌
之民兄弟畜一獵犬省臣將籍其家公言國制華人畜
鷹犬獵者沒入家貲今當以不應畜犬坐之且萬無弟
兄俱坐理衆是公言止坐其弟公每偕五府錄囚必再
三詳讞或言彼辭已具當置於法若從其反不愈淹滯
平公曰民之犯罪始則有司薄責次則風憲審理朝廷
復遣五府共讞之者正惟或有冤抑若止以郡縣成牘

為是將見死者銜冤地下寧不負國家好生之德歟聞
者是之及其治有罪者則亦未嘗少寬假也和林宣慰
司盜糧萬石公發其罪治之湖南宣慰司受賕千定事
覺賂中貴求援公劾其事正之有善角抵承命為郡佐
官者公極言其不可罷之泗州民饑公按部至其境曰
比請得可則野有餓莩矣首捐俸稍以倡僚吏大家爭
先出米得萬餘石全活若干人海獠為梗故事調兵誅
之公曰遠民素無教或相讐殺出沒不常其俗然也若

遽兵之則將害及平民請守險隘以遏奔突彼窮自不
能出矣朝議從之鳳翔歲旱公率憲人禱於郡之龍湫
歸及中途而雨秋果大熟公平生尤喜薦士所薦者多
知名於時事母至孝得其歡心庭有植竹而芝生焉翰
林姚文公集賢蕭貞敏公賦詩頌美謂公誠孝所感云
韓氏居燕世仕遼金名為衣冠大族國初徙家於衛考
府君天麟累官奉議大夫兵部郎中贈嘉議大夫兵部
尚書上輕車都尉南陽郡侯妣南陽郡夫人梁氏公及

其兄工部尚書康靖侯冲並顯於世娶高氏先七年卒
享年七十有二累封南陽郡夫人三子汝楫由河南行
省照磨進承務郎岳州路推官汝霖歷同知息州事內
邱縣尹陝西行臺掾史進承直郎揚州路海陵縣尹汝
梅未仕一女適郭居仁汝霖以公命為康靖侯公享年
七十有九以至順二年九月甲午終於汴梁寓舍十月
庚午葬汲縣親仁鄉康公原有司以聞制贈集賢直學
士亞中大夫輕車都尉追封南陽郡侯謚貞孝銘曰

洪惟世皇宅中圖治稽古建官文武皆脩當國之初法
簡而寬寬則易弛刑獄滋煩肅而正之乃建臺憲翼善
去邪不戒用勸羣賢彙征百度斯貞熏為泰和九有宴
寧公於其時接武諸老言有所承動有所考孰為矯亢
忍是苛刻不吐不茹剛柔以德其言侃侃囹圄空虛民
無寃者自昔多士貴在樂育成周之隆詩歌棧樸至元
大德蔚乎才能如公一門伯仲偕興時方治安才不勝
用內朝外廷罔有輕重天篤其慶公壽且康有子奕奕

令聲孔揚刻石載文允著厥美尚世公官以贊風紀

元故朝列大夫開州尹董公神道碑銘

并序

國家有世德之族曰稟城董氏由其祖父皆以忠義許
國孝友刑家才子賢孫亦各思自樹立是以清規雅範
相傳百年不隕其家聲嗚呼非祖考德業積累之厚朝
廷治化涵濡之深其何能至於是耶公諱士良字善卿
贈光祿大夫大司徒趙國宣懿公諱昕之曾孫龍虎衛
上將軍行元帥府事贈推忠翊運効節功臣太傅開府

儀同三司上柱國趙國忠烈公諱俊之孫資德大夫僉
樞密院事典瑞卿贈體仁保德佐運功臣太師儀同三
司上柱國趙國正獻公諱文忠之子資政大夫御史中
丞贈純誠肅政功臣太傅開府儀同三司上柱國趙國
清獻公士珍之弟也大德初公起家承直郎保定路曲
陽縣尹轉承德郎同知開州遷奉議大夫知博興州移
州藤州陞朝列大夫開州尹公入官三十餘年僅歷五
考積階至正四品不克大有所施而卒識者惜之然其

故家風範之嚴君子豈弟之政亦有可紀者焉初正獻公薨世祖思其謀猷獻贊之益召見諸子公偕弟故陝西行臺中丞士恭入見上熟視之指公謂左右曰是子純善甚肖其父遂命弟兄俱列宿衛無何公以母疾謝歸久之遂承世澤持身以廉毫髮無所私所至以化民興學為本曲陽民有善持官吏短長者醉則入縣詈吏人莫敢何公械於獄盡俾入市曉之惡少望風屏息五臺勅建佛宮西僧入京師者道出其邑供億浩穰民不

堪命公言於朝請裁省其冗濫仍令分行旁縣少舒民
力從之邑陶縹瓷歲貢有常是年色幻為赤奇異可玩
公曰禮奇器不入宮今若輸之是求媚也朝廷若復欲
之民何由致悉毀而瘞之人服其識博興學廩不足養
士公捐俸以助之士帥興起於學州民有輦母行丐市
中矯俗以為孝者公諭以養親之道其人慚謝改悔卒
以孝稱及聞清獻公喪解官會葬時以友悌多之勝州
歲旱民饑公下車發倉賑貧乏全活者衆齋沐出禱而

雨歲則大穰為政不施鞭朴第務以身帥之民亦化服
老幼誦公之政不絕口公嘗以事之曲阜孔氏族人有
相爭積年不解者聞公慈祥之政感而相謂曰我輩所
為愧見董公遂相友睦如初公官滿貧不能歸泰定四
年六月二十六日卒於滕之官舍享年六十有三歲
十月歸葬九門先塋公沈默簡重無疾言遽色性樂安
靜不能隨俗俯仰生長大家接人遇物謙抑若寒士隨
牒仕郡縣間無不足之色宗族父兄布滿朝宇赫然貴

顯未嘗一言以求進取蓋雍容進退有古君子之風焉
家貧奉養清儉稍有贏餘即分遺親族之貧者嘗書壁
以自警若曰積善獲慶不善則否造物者寧有私乎又
曰草木各有時而榮人可不堅所守乎故自號固窮子
母趙國夫人顧氏元配牛氏先卒繼唐氏李氏子男守
成厯主武邑梁縣簿今從仕郎真定衡水縣尹治民有
聲女適燕南鄉貢進士王維賢先正有言所貴乎世家
者非必七葉珥貂如漢金張八葉宰相如唐蕭氏名位

雖崇而不能皆賢何世之有若東都袁楊二族名德俱隆斯可謂世家矣董氏自忠烈公起家今傳七世子孫羣從益數百人雖先後出處不侔然皆清慎純篤蔚有賢聲不謂之世家可乎故士大夫言法家者必以董氏為稱首公亦能守先訓者也銘曰

世祿之家驕淫矜誇古昔猶然何今之嗟趙有董氏冠蓋盈里巍巍相門濟濟才子佩玉簪裾執禮弗渝百年相傳具有範模公侍禁庭長承父澤雍雍以和不大聲

色歷典郡邑嘉善輯奸鞭朴不施民用孔安公之父兄
位列將相公官於外白首猶壯致君澤民內外相維世
德之族邦家之基何天於公弗大厥祉弗大厥祉公又
有子子賢而文克肖克承公侯之復於焉其徵琢石徵
銘表公墓道凡代大家文獻是考

元故榮祿大夫御史中丞贈推誠佐治濟美功臣

河南行省平章政事冀國董忠肅公墓誌銘

有序

御史中丞董公既薨天子聞之震悼賻錢二萬五千緡

給其喪靈車南還命所過郡縣發卒護之又勅詞林奉
常議封謚加贈推誠佐治濟美功臣河南江北等處行
中書省平章政事柱國追封冀國公謚忠肅及葬子鎧
遂來請銘蓋公生長世家厯事五朝清規厚德為時名
臣是宜勒銘幽宮昭示後世按公諱守簡字子敬少端
重如成人不好嬉戲族長者奇之稍長出就外傳涉獵
書史兼善騎射年二十餘入脩宿衛仁宗自居潛邸喜
聞民間利病臣下能否公番直未嘗失時出入尤謹禮

節上察識之先是公兄守中僉典瑞院事上一日特命
公為集賢侍讀學士公奏曰臣兄弟以先世之故並侍
禁廷臣學行不如臣兄遠甚夙夜祇懼惟恐不及臣聞
國家建集賢置學士本以論思獻納輔翼聖德臣實不
任其職上悅曰惇崇謙讓卿家法也朕為卿成其美詔
以守中遷集賢公官典瑞階朝列大夫世族子孫聞者
師興於讓矣上雅愛尚文學勅印真德秀大學衍義分
賜侍臣俾知忠君愛民之說公與賜馬朝暮誦習必欲

見諸行事時承平歲久機務多暇左右間進以酒公從容陳衍義沈湎之戒上嘉納之遽命却飲英宗臨朝威嚴若神廷臣懍懍畏懼公以清謹愈見親信上將有事於山川丞相柏柱請公使蜀公歸上曰卿來何暮對曰臣祠事畢道經關中見民饑饉移文行省俟發粟而後行是以來晚上曰卿朕之汲黯重加賜焉典瑞掌尚方符璽公父祖昆季恒久居之公在職十年不遷他官未嘗有所陳請文皇入立進階嘉議大夫出為淮安路總

管三年移守汴梁皆有治績當天厯用兵之後江淮大旱田苗槁死民無所食公下車首倡寮寀捐俸以活之郡大家爭為出米及錢凡居者則給錢治生不令流徙過者則具饘粥食之慮有蹂踐之患則處以寬大之所盡三月而止未幾朝廷發粟之令下公始沛然足周其民矣淮安居南北之衝江南貢賦皆由邗溝入淮以達京師歲久邗溝填闕又值旱乾水涸公請因歲歉官出錢募民濬治以通舟楫行省是之踰月功成公私皆便

明年夏麥將熟天久雨公齋沐致禱而雨隨止職田所
入公以民懼饑荒皆不忍取嘗曰治民當除其暴則善
安淮安宋總管者黨與十餘人專持官吏短長為郡民
害公發其奸杖而遣之闔郡稱快他州刑獄田宅昏嫁
之訟久不決者憲府屢屬公治之公將之汴民老幼相
帥數千遮留數日不得行公以一騎潛由他道而去汴
梁獄訟尤煩公聽決益精明民以為神齊人藥某因官
家汴既沒葬焉有弟利其資產迫嫂發所藏返葬於鄉

嫂不願行匿其夫枯骨一體弟訟之官嫂遂下獄鄰有
豪民欲乘急賤買其田宅乃與弟共賂獄卒殺嫂以病
死聞公疑其冤訊之即伏弟及豪民獄卒皆死宛邱惡
少構同黨武斷鄉曲衆不能堪諷同黨殺惡少挈其妻
出走事覺官執惡少族人坐之公閱其牘問曰惡少之
妻何往乃擒同黨訊之具得其情族人獲免汴人迄今
誦之不忘甫期擢海北道廉訪使改江浙財賦總管無
何又擢江東道廉訪使公莊嚴正大風節所臨遠近敬

服貪吏聞風或自引去廣海徭人數出為梗俘掠良家
子女數百人而湖廣省臣總兵者玩歲愒日公劾其罪
罷之移書行省別遣官調兵大破徭人悉以子女歸其
父母江東同寮有不克遵憲度者公即退歸田里未幾
召為大都路總管固辭不起上遣使賜以上尊勞而起
之公以京畿多勢家大族當以威嚴鎮之適豪民犯法
杖之幾死上下震竄數月之間翕然稱治遷樞密院判
官奉命董治屯田舊時院官治屯田者絕無所擾故禾

麥屢登倉庾充實比年董治者侵漁百端至公始復其
舊軍大和會詔賜幣四端以旌其勞至正改元擢山東
道廉訪使未行拜中奉大夫陝西行省參知政事又除
江西道廉訪使未上拜內臺侍御史尋拜湖廣行省左
丞階資善大夫改拜南臺御史中丞四年詔拜內臺中
丞國家以三臺中丞之選非勲舊德望不輕授之董氏
自公之伯祖忠穆公文用世父忠宣公士選叔士恭及
公父子仲兄守庸相繼為之衣冠傳為盛事公列臺臣

朝著肅清薦舉務求碩才執法平允不苛嘗嘆文吏用法深刻故人多怨蓋處心忠厚類此九月拜中書左丞階資德大夫尋命知經筵事中原頻年水旱民力困弊是歲夏秋大雨河決曹濟之間既而盜起青徐郡縣多被其害明年民大饑轉死者相枕籍公言於兩丞相出粟與幣分行賑救是時省中漢人惟公晝夜深思拯民之策形容為之憔悴有司以患盜為言或曰當嚴刑以治之則盜可戢公曰民之為盜迫於饑寒今不思所以

裕民而欲刑殺以逞威將見盜愈滋矣或又曰昔狂寇
范孟伏誅而連坐未竟若與郡盜表裏交構汴梁危矣
公曰罪人既已正法州縣一時信文書奉行容有不知
何得俱以為罪又況事在赦前豈可使國家失信於人
更重其反側乎置不問者百餘人朝儀因盜發秦漢人
不得執弓矢法甚重上曰董左丞父祖佐祖宗征伐取
天下豈得偕漢人禁之賜良弓二命其族人皆得執弓
矢如舊制會大比進士命公董之既已廷對銓曹以入

粟補官者衆無官授進士公曰列聖興學作士所以選
賢登治也今進士擢第而曰無官授之是輕問學之士
而重入粟之人也豈不貽天下後世譏笑乎遂賜進士
官有差四月上北幸命公留守京師乃出御服以賜又
命公董修遼金宋史刪訂至正條格十月復拜御史中
丞六年四月進陞榮祿大夫公辭上曰卿先世伐宋有
大勲勞卿事先朝及朕忠勤不懈故特進階一品卿勿
固讓翌日扈駕至行幄又解御衣以賜上之眷遇公者

非他宰執比也五月庚子公以疾薨於位春秋五十有
五六月癸酉葬九門先塋公世真定豪城人曾祖俊龍
虎衛上將軍行元帥府事贈推忠翊運効節功臣太傅
開府儀同三司上柱國趙國正獻公父士珍資政大夫
御史中丞贈誠純肅政功臣太傅開府儀同三司上柱
國趙國清獻公曾祖妣李氏祖妣顧氏妣柴氏俱封趙
國夫人公平生廉慎自持雖同官餽遺一無所取敝衣
蔬食不擇甘美俸祿所入遇祭祀則致其豐宗族貧者

昏喪皆有所給公退杜門讀書而無私謁所至敦勸多
士興起於學淮安汴梁皆新學宮及三皇祠宇家居教
子必延碩師里中寒家亦使子弟執經就學師之所需
皆公資之藏書萬卷餘以遺其子子亦向學有聞公配
烏氏河南道按察使禔之孫贈秘書郎處士冲之女封
趙國夫人能經經傳大義治家有法次王氏克執婦道
子男二長錢早承家訓終內供奉次鎧有政事材搢紳
推重女二長適秘書監丞鄭郊次適崇福司丞張歪頭

孫男尚幼初清獻公既葬天子勅儒臣製銘賜公刻石
公在政府不敢告歸疾革命鎧鎧卒成公之志公薨鎧
訪輯公事甚勤考公立朝大節以及片言細行惟恐遺
軼鎧也可謂能子矣銘曰

於赫太祖奄奠中土豪傑彙興先後疏附桓桓忠烈以
忠隕身天報之豐燕及後昆或典兵戎或掌符璽惟幄
之謀耳目之寄昆仲羣從皆賢而才門閥巍巍福祿鼎
來家範雖正亦本賦與公性純誠不茹不吐入直禁闥

莊慎而謙歷持憲節威容孔嚴惜才如渴愛民如子炳
炳相業著在信史開國惟公趙冀疏封殆公五世錫爵
攸同克貽有終斯永厥世克念其初斯善於斷既達其
流益濬其源子繼孫承尚永勿諼



滋溪文稿卷十二

欽定四庫全書

集部

滋溪文稿卷十三

詳校官庶吉士

臣陳若霖

中書

臣

劉源溥覆勘

總校官編修銜

臣

朱鈐

校對官中書

臣

李斯咏

謄錄監生

臣

趙麟占

欽定四庫全書

滋溪文稿卷十三

元 蘇天爵 撰

碑誌

元故翰林直學士贈國子祭酒謚文安謝公神道

碑銘 并序

翰林直學士大中大夫知制誥同修國史贈國子祭酒
輕車都尉陳留郡侯謚文安謝公諱端字敬德葬武昌

江夏縣洪山之陽至正二年冬天爵來官鄂省其子請
銘公碑昔我祖宗既撫方夏盡收豪傑耆俊尊禮而任
用之考定憲度襄贊隆平至大德末故老日漸淪逝後
學之士隱伏於山林州閭而弗克奮仁宗皇帝獨出睿
斷肇興貢舉網羅賢能於是人材輩出以文學政事著
名於世若公者益亦表表可述者歟延祐元年八月公
中河南鄉貢尋丁內艱五年賜進士出身授承事郎同
知湘陰州事秩滿赴調京師由故相張公珪薦擢國子

博士進儒林郎改太常博士階奉訓大夫轉翰林修撰
同知制誥兼國史院編修官三官就遷待制官朝列大
夫凡再任階中順大夫選為國子司業陞亞中大夫復
入翰林為直學士公之先遂州青石人宋季避兵出蜀
居江陵至公始家武昌曾祖繼先祖元賁考雄曾祖妣
黃氏祖妣妣皆牟氏祖贈中順大夫禮部侍郎上騎都
尉陳留郡伯妣封陳留郡君考贈翰林直學士亞中大
夫輕車都尉陳留郡侯妣封陳留郡夫人公卒以至元

六年夏五月庚午享年六十有二葬以是歲秋八月丙申元配陳留郡夫人史氏祔子搢補國子員以公廕為石門丞公世儒家侍郎深通玄象發言驚人江陵制置使孟公珙敬禮之居數年忽中夜叩牙門謂孟公曰流星出下階沒西方一刻所息占為天士亡某實當之明年荆楚大將死公是也其後所言皆驗公資穎異年十歲時讀書江陵郡學習為科舉之文援筆立就屢出同舍生上其師異之弱冠偕故禮部尚書廣陽宋公本從

王公奎文遊講明性理之學俱有才名郡人以謝宋稱
之翰林姚文公燧以雄文擅當代讀者或不能句公一
見並與其用意所在發之姚公大喜即以茂才薦之初
仕湘陰時年尚少然發摘奸伏已能使老吏有所憚驚
焉國朝宗廟之制範金為主泰定四年夏四月某甲子
有盜入第入室竊之明日當時享衆議為位祀之公言
四時之祭皆用孟月有故即用仲月今盜入柘室震驚
神靈時享當用仲月奏可其請公教胄子嚴毅方正諸

生凜凜畏服講說經義能明聖賢之旨諸生質疑請問
無倦夜則引燭課試程文亦使漸趨平實不為浮華淺
薄之說凡士子鄉舉會試廷對及國子積分公數與考
第之列所取者多博學有聞而初學小生往往被黜士
論咸服其公公為文辭簡而有法序事核實言無溢美
累朝信史典冊制詔當代公卿祠墓碑版多出公手嘗
憤近世士習卑陋故修辭專務高古以不同俗為主有
遺文若干卷其於前代君臣得失古今文章美惡歷歷

能道其詳遼宋金國興廢人物賢否亦皆精熟嘗以不
克纂述三史為憾天厯至順以來郊廟祠享禮儀討論
裁訂公多與焉蓋世之於公第知其文學而已不知公
政事之材為可稱也湘陰學宮故敝公始新之暇則考
其所業而學則帥知興起西鄉有隄護民田千餘頃隄
壞官歲修之以為利民因捕魚發掘以納夏潦至秋徵
租雖鞭笞無從得遂及鄰鄉公私病之公計其工若干
諭民黃恭出粟若干石身督其民築之堅完迄今不墮

先是賦役不均豪宗大姓數免貧者不勝其苦公命具書民田於籍差其多寡役之田元貴者嘗被省檄為巡徼武斷鄉曲締構路府持州長史短長官不能誰何公至或訟元貴據其妻不還公取狀閱之同列顧左右起公獨敕吏作符召之曰否則吾就縛之元貴不得已而出公示以狀即服杖而遣之亡何又犯法杖而赭其門書惡焉元貴徙傍郡終公任不敢歸盜有殺賈人及從者三而攘其財棄屍井中其家累訟於州及府皆以無

佐驗不為理公微服宿盜里中庶得其實躬往捕之盜
不伏并收其妻鞠之妻時時仰視其屋公曰異在此矣
屋蓋新葺大竹為椽公使人發視之財悉藏竹中盜遂
吐實出四人屍井中乃訖獄州人神之部使者聞公之
名或他州訟獄弗能決者亦檄公治之公去湘陰二十
餘年民猶頌其遺愛公在朝著以文字為職業從容多
暇廣陽宋公時已登第歷官省曹事或有所疑輒從公
論決悉中肯綮衆皆推公材識惜其不果於從政也當

宋之亡士之有材名者朝廷皆被徵用初無南北之間
若程公鉅夫燕公楠陸公塋是也公湘陰之政所試者
小而已受其惠若見諸大用當何如哉歐陽公玄誌
公之墓謂公材器宜居言官處政途世不用不極為恨
蓋猶愈於既用而缺人望者也嗚呼士有抱負藝能而
不克盡施於用者豈獨公乎銘曰

於皇世宗景運天開肇興貢舉網羅異才如風驅雲如
山有臺博帶褒衣群賢鼎來帝始思賢當寧興嘆公應

明詔奮起江漢射策王廷才華有爛其儀委蛇其言侃
侃筮仕外郡造茲民庸相國薦賢敷教壁雍壁雍皇皇
多士景從講古述今文治昭融乃入禁外掌帝之制潤
色之工辭典而麗論著信史具有凡例簡冊尊嚴垂範
來世豈弟君子邦家之基公於從政有猷有為治化既
同海宇一時維楚有材晉猶用之公用弗極言足行遠
洪山之陽有墳有衍樹以栢松勿伐勿翦列銘貞石繼
壽而顯

元故朝列大夫禮部員外郎任君墓誌銘

并序

昔歐陽子善為銘章論次賢士大夫功行至於朋友故舊握手言笑方從其遊遽哭其死遂銘其藏未嘗不感歎致意焉今於任君之卒而儕流為之痛悼者也天爵與君三為同官相從最久暇則杯酒論文繼以談笑風議君儀容偉然若古松柏豈意遽哭其喪而銘其墓歟君初為翰林從事及見諸老儒者舊接其餘緒為編修官應奉文字凡記載之體祈禳秘祝之文亦皆有法丁

皇考尚書憂服除調省汴檢校官會文皇帝入立乘輿
經汴擢河南憲司經歷明年改江西進南行臺御史盛
暑乘傳詣廣州按問省臣盜海舶罪又分行閩浙而浙
憲官相訐持奪印章失風憲體皆劾去召拜中臺御史
偕同列糾省省丞相貪墨杖而奪其官風節之後遷禮
部員外郎稽訂禮文省節浮費尤多詔選官錄囚郡國
天爵時佐右曹以君薦宰臣或曰彼儒者可乎某曰正
唯儒者能治獄也陝之諸州西南極金洋褒鳳北則綏

麟葭丹山川險遠荒寒君親歷之歲餘始還果能活冤獄若干人未始有一濫死者君為人廉靜簡默不妄進取其為憲僚簿書出納纖悉有方吏畏服莫敢欺詆然臨事則忠厚識大體性至孝自尚書卒獨奉其母有弟五人貧不能家君屢請補外官以養親及其諸弟不克如其志卒之日家無餘貲槨無新衣弔者莫不悲之中書宥密而下各賻鈔若干貫始買棺槨治其喪君諱格字大正河南洛陽人享年五十有八其曾祖考贈亞中

大夫輕車都尉樂安郡公次公妣樂安郡夫人梁氏祖
考贈嘉議大夫上輕車都尉樂安郡侯用妣樂安郡夫
人楊氏皇考亞中大夫戶部尚書秉直母樂安郡夫人
朱氏君娶樂安郡君某氏有男五歲曰典牛女十歲曰
漳其葬在洛陽水南原其卒至元四年戊寅二月十三
日也銘曰

中尊而終匪天而凶郎官御史匪否而窮何厚其材不
俾其隆歸咎無所納銘幽宮

元故翰林直學士贈國子祭酒范陽郡侯謚文清

宋公墓誌銘

并序

宋氏世家京師公諱褰字顯夫由進士出身卒官翰林直學士亞中大夫知制誥同修國史兼經筵官葬宛平縣香山鄉樞山原衡州路安仁縣尹贈戶部尚書楨之子禮部尚書奎章閣承制學士謚正獻本之弟母曰范陽郡夫人李氏至元甲午戶部主興山簿公生色中稍長流落江漢間綴學勤苦戶部為小官祿薄公兄弟授

徒以為養皇慶初貢舉詔下始習經義策問延祐六年
挾其所作歌詩從正獻來京師清河元公明善濟南張
公養浩東平蔡公文淵王公士熙方以文學顯於朝見
公伯仲驚嘆以為異人爭尉薦之會蔡公王公試大都
鄉貢士正獻名冠第一公文亦在選中以解額不足而
止又三年汝陽曹公元用蜀郡虞公集南陽李未魯公
紳為考官公遂擢第除秘書監校書郎安南使者朝貢
而歸選公充館伴使將別使者以金為贐公却之改翰

林國史院編修官詹事院立選為照磨尋辟御史臺掾
辭轉太禧宗禋院照磨元統初遷翰林修撰與修天厯
實錄承詔祀天妃於閩海登舟風作舟人皆懼公曰吾
奉天子命以香致虔以海漕為禱又何懼為頃之風息
竣事而還復號至元之三年拜監察御史時災異並臻
公言列聖臨御治安百年皇上繼統未聞過舉今一歲
之內日月薄蝕星文垂象正月元日千步廊火六月河
朔大水泛溢城郭八月京師地震毀落宗廟殿壁震驚

神靈豈朝政未修民瘼未愈所致然歟宜集大臣講求
弭災之道務施實惠勿尚虛文庶可上答天譴下遂民
生臺臣以聞上命中書集議弊政詔天下京畿之東霖
雨傷稼餓殍盈路公按行見之倡言其故朝廷出鈔若
千萬貫命公賑之生者不致於流亡公之力也出僉山
南廩訪司事峽州房陵屬邑在萬山中公不憚崎嶇雖
盛暑冒霧露毒皆身歷之唯以洗冤澤物為心宜城民
與富家爭刈麥共毆而死及貽縣吏俾一人承之公得

其情坐吏及共毆者罪安陸寡婦有罪自頸或疑其夫兄及妹壻殺之屍爛已不可驗遂皆誣伏始則曰以寡婦私逸用棠木杖擊死棄屍溝中次則曰用山桑及栗木擊之而死公疑用杖不同乃曰寡婦之骨得無損乎命他官發墓驗之而寡婦尚以繩繫其頸於是破枷出二人獄國制獲盜五人者得官應山民被劫巡徼執五人坐之以冀官賞獄具公疑而訊之果皆良民而巡徼以罪免五人者非公之明死獄中矣是皆司刑者辭避

而不肯為公一一能直其寃人大稱之嗚呼世以儒者迂濶於事情濡滯於時務常鄙薄之彼則舞文法以肆苛刻專逢迎以為變通孰有惻怛愛民如公者乎至正之初改陝西行臺都事月餘召拜翰林待制遷國子司業勅修遼金宋史公分纂宋高宗紀及選舉志書成超拜翰林直學士賜白金五十兩織金文綺四端尋又命兼經筵講說明白屢承恩賜搢紳以為榮公學務博尤喜為詩自少敏悟出語驚人嘗曰造語引事皆當出唐

以前不然則非唐矣有文號燕石集若干卷集選本朝
歌詩曰妙品上上曰名家曰賞音曰情境超誼曰才情
等集又若干卷齊魯號稱多士公兩被命考其鄉貢又
嘗為廷試讀卷官選擇精詳士論推服其在風紀薦士
尤衆澠州孝子段懋父沒執喪哀苦廬墓三年不歸負
土築墳寒暑不懈公核實其行遂旌異其門閭國人託
寅者少侍父官家隨屏居讀書不事進取荆襄士多稱
之譽之公表其行於朝果徵用焉公性樂易家雖甚貧

待親友無所靳當官有守或上司同列事不合義言不
中度雖迫之以聲勢怵之以禍福公毅然操持不變是
則公伯仲家庭講學之功抑亦國家庠序之士之所致
歟公享年五十有三卒以至正六年三月甲午葬以是
月庚子贈大中大夫國子祭酒輕車都尉范陽郡侯謚
文清娶劉氏封京兆郡夫人二子顓顓補國子員六女
在室公先世墳墓在京師故城南宜泉村原戶部僑葬
江陵正獻始兆塋山公將遷戶部樞北歸以貧不克疾

革猶以為言公葬猶子中書掾續序次行事來請銘天爵昔官朝著公及正獻休旬數過吾家或論文史或評古今孰憶二公皆以盛年相繼去世然則銘公之墓非故人之責歟銘曰

仁皇御極天下文明崇儒稽古多士斯興惟公伯仲時稱二宋出應明時祥麟威鳳憲臺秘府詞林璧雍優游清華議論從容士貴多聞尤貴絕識操之有要斯能不忒公居官守事不詭隨号号其節抑抑其儀天生賢才

惟以治世胡不百年為三有事泊乎委順歸寧故邱啓
爾後人尚承公休

禮部員外郎王君墓誌銘

元統乙亥春正月庚子禮部員外郎王君文若景星甫
卒中書憲臺各賻鈔若干貫治其喪是月庚戌歸葬其
鄉先墓其友左司員外郎張惟敏屬天爵考君官世行
治為之銘昔者國家設邦於燕保定真定皆為輔郡一
時材臣官於朝者實甲他邦君世真定安平人以儒起

家為保定校官大興儒官諷郡人興于學故相蔡國張公方以司徒家居薦其材由是聲聞於衆會張公復入為相辟君為東曹掾出官承務郎兵部主事轉中書校檢官擢拜監察御史遷戶部員外郎改禮部積官朝散大夫君少孤貧長耕於野暮歸讀書至古人奇節偉行心好慕之故其為人磊落明白毅然不苟戲笑言論切直人有過輒面斥之在御史府號稱敢言時臺臣有為奸利者事覺賂中貴求援君廷爭之卒正其罪承詔按

事北邊劾罷行省平章一人風采凜凜薦拔士之賢而
在下者十餘人材任風紀又言蔡國張公祖父再世積
有勲列天厯之初諸子橫罹戕害官籍其官宜革正之
以為昭代勲臣之勸及官戶部錢穀金幣力能止其濫
出者蓋君平生果於有為類此初來京師與今奎章閣
供奉學士尚師簡淮東鹽運使賈垕淮西廩訪副使趙
知彰太禧院判官韓鏞故刑部侍郎范希昉時時從游
賦詩飲酒以為樂已而俱顯於時君與希昉獨相繼去

世搢紳惜之君享年五十有三疾革遺命其家甚悉比卒不亂曾祖逸其諱祖賢考璿皆以經訓教授鄉閭考以君貴贈奉議大夫樞密院判官母劉氏贈安平縣君娶段氏封安平縣君有妾方娘未知其子之男女銘曰惟昔相臣求士報國匪苟於同好是正直侃侃王君氣直而剛不變其守君子之材方未盡施正晝而隕爰述銘詩尚其不泯

元故奉訓大夫湖廣等處儒學提舉黃公墓碑

銘并序

閩有名士黃公諱清老字子肅由進士起家累遷奉訓大夫湖廣等處儒學提舉至正八年八月庚寅以疾卒官舍享年五十有九明年五月己酉葬邵武縣龍岡津之原諸孤模樞遣其弟梓請銘墓道昔者天爵與公同官詞林又同奉詔撰次國史故不忍辭按黃氏光之固始人諱惟淡者徙閩五子各明一經世號黃五經家貴溪令知良第三子也居邵武之和平鄉及子俏生植樹

於門曰汝大則吾宗蕃衍既久樹乃暢茂倘有子二十
一人宋元豐間其孫德裕官少保又再世通為右司郎
中母弟景從與其弟安之屢試南宮不偶曰吾家累世
登第今造物獨於吾父子嗇之豈將豐其後乎至公果
中科名安之生寄孫是為公考以公貴贈奉訓大夫知
福清州騎尉邵武縣男母夫人詹氏封邵武縣太君
公資穎悟眉目如畫五歲日記數千言七歲學屬文鄉
先生李玉林見之嘆曰是可繼黃童矣號閩多士內附

之初前修碩儒猶有存者而文獻之傳性理之學往往
專門名家公日從諸老講求其說聞見彌廣聲聞彌著
同舍生或趨世所尚為吏以事進取獨公篤志勵學不
變如初久之部使者薦為建陽學官年始踰冠士已推
服邑之儒先嚴斗巖者至元季年有詔徵之不起公師
事之斗巖曰吾昔受學於嚴滄浪今得子相從吾無恨
矣公自是於六經四書之旨悅若有得進三山書院山
長弗就挾書入深山之中益究其所未至於是國家設

貢舉十餘年矣泰定丙寅之秋郡守舉公應詔浙省之士試者恒數千人是歲公以春秋擢居第一明年會試中選廷對賜同進士出身中朝搢紳多知公名而禮部尚書曹公毛用翰林直學士馬公祖常請留公居館閣遂除翰林國史院典籍官未幾陞檢閱官又遷應奉翰林文字同知制誥兼國史院編修官英宗一朝大典撰述未終國有大故命公與天爵修為成書四十卷又奉旨分纂明廟實錄皆藏史館又嘗執筆扈行上京凡朝

廷有大議論除拜祠享詔令祝冊應用之文公偕學士
虞公集歐陽公玄謝公端獲與討論是時文皇崇尚儒
術左右侍從有以公姓名上聞者元統初時宰請罷貢
舉已而詔復行之乃命中外作興學校以經術造士行
省提學皆慎其選公是以有湖廣提舉之命湖湘之間
士尚文辭公申嚴課試經訓遠近知勸吏白廣海學官
或有冒濫當覈實之公曰三苗久阻聲教今方會同中
國士夫衝犯瘴癘往為之師甚可矜念吾何忍於逆詐

乎提舉月俸於學廩給之比歲擬郡縣公田多取其直
公不許每賓興之歲藩省大臣屢請公校文去取精詳
士論推服公善教誘後進初在朝著宰執王公懋德史
公惟良及一時名公卿各遣子弟執經受業四方之人
亦有不遠千里而至者作成人材居多若今四川行省
叅政歸賜僉燕南廉訪司事王儀監察御史篤堅不花
中書左司都事田復太常奉禮郎程堽應奉翰林文子
李繡則尤知名者也風紀之官列薦公可教國子廷臣

方議召公而公卒矣故聞其訃者咸為之盡傷焉公風
度凝重廉靜鎮密一室蕭然圖書自樂居京師不妄造謁
世以是重其學守文字雅馴詩飄逸有盛唐存於稿者
三千五百餘篇又著春秋經旨若干卷四書一貫若干
卷學者爭傳習之公元配蔣氏先卒贈邵武縣君繼室
吳氏封邵武縣君亦卒子男六近仁早逝次模樞梓杞
櫟皆業進士女三長適上官文本次吳國瑞幼在室公
事唐夫人盡孝養每欲輦母之官夫人不忍離鄉里公

數以省母在告世稱其孝焉嘗訪得嚴滄浪故居將築室共斗岩祠之弗果今卜葬密邇其地諸子尚能成公之志歟銘曰

閩居東南山川綿邈士處隱約如玉蘊璞海宇為一文教蜩興鄉有碩儒來師來承歲月其徂耆舊日替國無仁賢孰與共治設為貢舉網羅羣才無間邇遐崛起草萊英英黃公博雅溫厚和氣所鍾惟閩之秀冠衣楚楚入對大廷周旋雍容蔚有典型厯游清華編入信史公於

春秋深究厥旨總齊郡學振興皇風祁祁多士禮義惟
恭世皆謂公宜教胄子年踰知命遽止於此士思公學
心其好而嗟爾閩人室豈遠而

朝列大夫監察御史孟君墓誌銘

至元五年春正月翰林修撰孟君擢拜監察御史是春
連日大風晝晦君率同列言當修省更化以弭天變章
上不報會臺檄君巡視河防南至汴潁秋七月還過其
里即移疾上印綬候屢促之堅辭不行未幾瘡生於臆

以是年冬十一月七日卒踰月余自維揚北還聞之弔
於其家其弟沂曰吾兄之葬尚未有銘按君諱泌字道
源世家陵州曾祖祐國初為某官將兵保其鄉邑祖郁
不仕父秉彝某郡教授累贈秘書少監平昌郡伯輕財
好義喜交當世名公卿士君幼受學於其父志尚犖犖
與常兒異年十七侍故御史中丞許公師敬游京師補
國子員能倍文暗誦經訓師友異之久之以積分中高
等生補國學錄又舉至治元年進士除冠州判官政餘

讀書不輟入翰林為編修時天爵為典籍官東平王公
壬熙治書中臺辟天爵為掾以病辭尋用君為之果以
材稱未幾復入翰林為應奉文字從幸上都還以父憂
去官服除調漢中廉訪司經歷憲使與其副不和君贊
畫無事歲辭歸召為修撰中書刪訂條格書未及進而
遷六察君為人謹厚不妄言笑可任以事自免喪家居
數年不事進取及被召士始相賀皆謂君且大用而君
亡矣嗚呼豈非其命也夫君享年四十有五葬州西南

某原母平原郡太君郭氏娶載氏贈平昌郡君繼李氏
奎章閣承制學士洵之女封平昌郡君子男某俱幼女
適王某銘曰

士方志學期於有為或負其能弗偶於時君仕中朝名
聲祁祁端車正轍孰柅其馳我銘玄宅尚識深悲

元故廣州路儒學教授傅君墓誌銘

至順三年新喻傅君與礪挾其所作歌詩來游京師不
數月公卿大夫皆知其名交口薦譽之蜀郡虞公廣陽

宋公方以斯文為任以異材薦之會今天子即位詔遣使者領正朔於安南以君才學為之叅佐受命即行至真定驛啟制書觀之上有王號君曰安南自陳曰烜已絕王封累朝賜書皆稱世子今無故自王之何也使者疑未決君獨請行至都堂白其事宰相大喜立奏改之安南之人往往以中國使者不習其國風土多設譎詐以紿使者至是君一一用言折之彼遂讐伏不敢相侮或郊迎張宴犒衆或盛飾侍姬侑酒君皆却之曰聖天

子遣使者來所以宣布德意不當重擾遠民至日世子
出郭迎詔帥國中之人共拜聽焉明年安南陪臣執禮
物來貢闕下君以功授廣州路儒學教授湖南及廣西
帥聞爭欲辟君為掾皆辭不就於是繕完廣之儒宮復
學若干畝未幾遇暴疾卒至正二年三月某日也君諱
若金與礪字也其先由相州因官家湘潭唐廣明初避
亂再徙臨江遂為新喻人宋川陝宣撫處置使變有子
曰雱紹興初假工部侍郎使金為通問使生新興令紀

紀生循州倅元余元余生韶州守君平君平生司戶价
价生頤頤生朝奉大夫實之實之生典江簿允迪允迪
生明可是為君父其母胡氏君賦質清美自幼為詩出
語驚人弱冠游湖南宣慰使阿榮招延於家賓主吟咏
不輟久之薦為岳麓書院直學即棄去卒年四十兩娶
皆孫氏無子父命以弟若霖之子德麟為後二女宜男
宜弟俱幼將以至正四年正月十二日葬新喻擢秀鄉
玉隆山君學長於毛氏詩尤喜漢魏盛唐諸作其詩數

百篇多可傳誦及使遠方果能以專對之才稱宜有銘
銘曰

士之窮經本以致用詩三百篇有諭有風達於從政專
對四方其或不能空周奚望傳君言詩上本風雅漢魏
盛唐作者之亞持節侃侃佐使南交言諭遠人玉帛以
朝我述銘章納於君墓後生學詩勿溺章句

滋溪文稿卷十三

欽定四庫全書

集部

滋溪文稿卷十四

五

詳校官庶吉士臣陳若霖

中書臣劉源溥覆勘

總校官進士臣楊懋珩

校對官中書臣范 璽

謄錄監生臣戴祖覃

欽定四庫全書

滋溪文稿卷十四

元 蘇天爵 撰

碑誌

故真定路儒學教授鄧軒張先生墓碣銘

至元季年僧格專政勢傾朝野親戚黨友布列藩方忤
恨睚眦輒中傷以危法中外震慄燕南宣慰使巴爾嘉僧
格之妻弟也恃勢為虐郡縣官屬聞京師為僧格立石

頌功業於是亦為巴爾嘉樹碑以阿其好故節軒先生張君方為郡學官衆以碑文見屬先生正色力謝却之度不可居即歸田里一時士論莫不重其風節其後僧格敗誅巴爾嘉亦相連坐而碑遂焚毀先是稿城有大儒曰王公若虛仕金季直翰林崔立劫殺時相而黨與請為立建碑表功誅王公銘之公曰作之則壞名節弗作則死孰若死之為愈竟辭弗作先生與王公生同里衍習其流風餘烈故識見之卓能若是也嗚呼士大夫以文

章名世當有學識以立名檢况金石之文義近于史可
以易為之乎若先生之潛德高行不可銘之以表見于
後世乎謹按國史院編修官董君士廉所述行狀先生
諱延字世昌家稿城之故邸里幼嘗與郡兒戲水濱衆
洄于水先生獨不為動儼然如成人元帥董公王公見
而奇之始令肄業于侍其提學軸既長學文于李翰林
治先生稟賦既異用力清苦問學高出時輩我國家撫
有中夏乃用金宋貢舉舊制試士中選者復其家先生

兩試于鄉初以明經擢前列又以詩賦冠多士而聲聞日彰彰矣故相董忠獻公經畧山東辟先生為統軍司諮議時李壇初伏誅先生與叅議高公明逸請宥協從以安東土無何以親者辭歸久之禮部尚書趙公椿齡復薦于朝遂除真定路教授先生教授崇尚名節學者興起事親至孝親疾不解帶親喪哀毀踰制鄉人範焉聚書數千卷築重屋以庋之為學孜孜老亦不懈或辨經傳之訛或訂史學之失至于氣候之暄涼交游之言

論悉筆于冊日有程度所著有周易備忘十卷中晉書
二卷要言一卷讀通鑑詩二卷因讀記二十卷集文十
卷稿城學舍歲久弗治先生率邑人完之邑中大族若
董氏趙氏王氏雖以將相勲閥之貴各遣子弟執經就
學先生師道尊嚴諸生賴其訓誨進多貴顯益振其家
聲先生享年六十有二以至元二十七年冬十月二十
五日卒葬新豐鄉杜家原考諱德用累官行軍萬戶妣
史氏配郝氏子男堂稿城學教諭女適侯某王某劉某

皆士族也孫男三思賢思溫思問孫女一人適彭孝純
曾孫六庸訥謚某某先生世本農家考府君國初奮
田間金降將武仙殺元帥史天倪復據真定諸郡連兵
討之考府君亦帥勇士五十八人夜潛入城縱火鼓譟
城中震駭仙走西山遂復真定居常訓子孫曰吾少長
兵間雖驍勇見稱于衆然恒以不齒士類為恥汝曹當
學為儒以續詩書之澤縱不富貴家道亦光故先生服
膺先訓卒以儒名子孫迄今修學為士銘曰

儒者之學貴守名節勢利易汙當全吾潔金石之文大
書特書義近于史言不可誣嗚嗚先生辭嚴義正惡彼
奸邪斥其餘佞歸休雍容著書滿家風節峻整道德光
華富貴無能或鮮知愧托之空言亦祇以異咨爾多士
操觚擣辭嗚嗚先生企其齊而

安先生墓誌銘

至治壬戌仲冬甲午恕齋先生安氏卒享年九十有五
二子熙煦皆前卒孫暨以是月戊戌葬先生于稿城縣

安仁鄉夫人劉氏祔焉先生諱松字庭幹太原離不人也金亡遷真定曾祖余廣祖昇皆不仕考滿真定儒學正妣賈氏先生少學於家庭尊聞行知聲問偉然至元癸未由名臣薦起家江淮轉運司知事歷潛江尉峽州司獄江東宣慰司照磨遂謝事歸再除建寧令不赴時年五十餘矣先生為吏廉謹治獄多陰功所去吏民見思其北歸也惟書籍衣衾而已教授于家嚴條要以身先之弟子從者多至百人動作悉有規矩講解明白不

為繳繞章句學尤善為詩溫厚和平得詩之意暇則與翰林王公唱酬有詩若干篇晚歲充養完粹毀譽懽戚無少介意不復仕終其身嗚呼位雖卑而名愈隆年益高而德彌邵若先生者可謂廉退老成君子矣銘曰

寒暑代謝天道之常仕止久速君子之方猗嗟先生名著昭代進不為汙隱不為泰道周于身化洽于鄉年及期順道然而亡人孰不仕知足或非人孰不壽七十猶稀猗嗟先生比德者鮮列銘幽墟克示悠遠

姬先生墓碣銘

君諱文龍字伯陽姓姬氏河東絳州人也世業儒術曾祖雍祖泰考德妣王氏金之季年考府君避地襄鄧間又渡江居鄂雖遭時多艱所至必擇師教子故君自少卓然有立宋咸淳四年以詞賦擢進士第初授迪功郎主郢之京山簿能聲獵獵用部使者李應春錢真孫郡守翟貴薦轉從政郎岳州教授荆湖制置使汪立信聞其名辟郢之長壽令進承直郎尋兼僉書判官廳事庫

庾倉廩皆君司之持身至廉一毫不以自私亦不以深刻聚斂為務時天兵圍襄郡縣多儲金帛以酬有功郢有金數萬兩君一日閱實而數不足主者於法當死君曰是必急有所需乃命償之至元十二年襄陽天兵降棄郢不攻而南郢之守臣乘便冒種官田竊庫金入其家君不能止乃收故牘藏之曰他日事覺悔無及矣宋亡朝廷遣使者稽核故宋金帛之在庾曰土之在籍入官者於是貪者相繼獲罪惟君獨無所得未幾例以故

官授之君斂身而退因家于郢猖狎林壑以終老焉當
是時來為荆閬及部使者多中朝舊家鉅儒如史公杞
姚公燧暢公師文馮公岵皆重禮君樽俎笑談日相樂
也而姚公馮公亦就家郢各遣子弟執經受學姚公疾
草語其子曰吾世冠衣大族有如一諱喪禮勿徇流俗
姬先生深明禮學汝當咨之公薨君主其喪衣衾棺斂
哀麻之制悉遵禮經觀者敬焉初君連值父母喪廬墓
哀號三年不歸與其弟光州文學掾震龍門居無間言

蓋其孝友之實見于行事類此非徒講誦禮文而已君性耿介或有餽遺一切不取人有過輒面折之一時官府多求君文章傳以為榮君亦因與箴規未嘗以一語相諛悅荆相山間九月桃復華部使者寫為圖求言君曰隕霜不殺草李梅實聖人筆之於策九月于卦為剝而桃復華表于按部之境抑亦民和之所致歟識者知其言之為有在也郢舊有白雪樓郡守撤而新極其宏麗為君記之君曰財非天雨工非役鬼一旦規飾逾昔

誰之力歟昔魯人為長府閔子騫曰何必改作及高大其南門聖人書之曰新作垂戒之意深矣郡守惡其詞直藏之不以示人君曰他日必有喜吾言者後十餘年中書叅議何公庭蘭命刻諸石君享年八十以延祐七年某月某日卒葬長壽縣東十三里祖墳之側將終索紙悉書遺命了然不亂娶眉山楊氏故宋叅知政事棟之從孫女子男鏞將仕佐郎主婺州金華簿擢湖廣行省掾女適張通陳書傳表滋皆儒家子滋為玉沙縣學

官孫男周南嗚呼宋養士三百年可謂厚矣及其亡也
居高位者往往喪其所守君以小官能晦迹山林不易
其業是可尚乎故表而銘之銘曰

維昔勝國重養士一時緩急有所恃滔滔江漢南國紀人
才侔儻匪風靡卓哉姬君學詩禮立言制行類有恥身
雖退藏名愈偉尚百千年石不毀

內丘林先生墓碣銘

世祖皇帝既定天下總攬豪傑布列有位猶慮道德之

士遜適林壑安車四馳登而用之至元十九年詔徵容
城劉文靖公因為太子贊善未幾辭歸復徵為集賢學
士遂不復起海內高其節義從而作興者不無人焉順
德內丘林君蓋其一也君諱起宗字伯始當四方會同
程朱遺言流布遠邇君誦之知敬用志堅苦或有所疑
思就有道而正焉于是覃懷許文正公已老劉文靖公
赫然以風節問學著名當世君欲往從之遊無以為介
擔簦負笈齋沐立于其門者三日文靖嘉其立志之卓

命序弟子之列君聞其講說深思體踐極其至而後已
文靖少然可獨稱君為善學久之以家貧思省其親文
靖授以治家之法君歸而行之家日益裕已而復往卒
業會文靖卒乃還君事親於溫清定省皆有禮節親喪
廬墓克盡其哀行既著聞士之從者日衆君儀容奇偉
衣冠雅潔晨起正襟危坐雖造次頃刻未嘗不整齊嚴
肅及與人言則和氣滿容講授經訓毫分縷析使諸生
心領意會出入左右咸中規矩名公鉅儒道出其邑即

請見焉見者若有所得鄉閭之人凜乎惟恐有一不善
為君所知觀感而化者多矣嘗作志學指南圖以為學
道之標準心學淵源圖以為入聖之極功及作中庸大
學論語孟子諸圖孝經圖解小學題辭發明魯菴家說
共數十卷大抵皆以程朱之言為主至大間故相王公
結來守順德始登君名于朝及長天官遂論薦之君年
既高所造益深優游丘園玩心神明以佚老焉享年七
十有六復號至元之三年二月九日終于家塋邑西南

永安里門生會葬者百餘人燕趙之士識與不識皆悼
惜之君曾祖某妣劉氏祖安妣田氏考泉妣張氏娶李
氏繼劉氏楊氏李氏子男曰欽女適儒氏張郁李秉直
張喜安次以疾在室昔我國家初有中夏士踵宋金餘
習以記誦詞章相誇尚許文正公始以孔孟之書程朱
之訓倡明斯道一時師友講習若河汾伊洛之盛劉文
靖公繼之士皆知趨正學不為異術他岐所惑文正公
被遇世祖徵居相位典教成均而門人貴游往往仕至

顯官文靖公既出即歸學者多窮而在下傳其師說私淑諸人兩公之門雖出處窮達有所不同其明道術以正人心蓋未始不一也然而宦達者聲名顯而彰隱處者其德業或湮晦而無聞于世君卒之八年余友兵部員外郎楊君俊民以進士范淳狀君之行為請夫賢者之墓宜有銘天爵生晚不及識君面官六察嘗薦知名士十餘人充國子師君亦與焉豈意今復執筆銘君之墓乎銘曰

維天之生財兮將以為世軌也明遺經以紹隆緒兮維
道所履也嗟若人之好修兮懷瑾瑜以為美也凜冰霜
以自固兮奮節義以勵乎已紛時俗之躁進兮若波流
而風靡也彼智者之過兮下愚者之無恥也抑先哲之
為依歸兮慎所行而知所止也銘以昭其隱德兮尚多
士之興起也

故處士贈秘書監秘書郎烏君墓碑銘

汴有隱君子曰烏君諱冲字叔備其先大寧路州州人

君從親官汴家焉明經勵行高蹈深隱享年五十有二以延祐二年五月十八日卒葬通許縣之西原後十四年外孫稿城董鎧奉母趙國夫人之命來請銘初靜修先生劉公因以高明之資躬聖賢之學道德風采聳動四方之從者者甚衆君年出二十亦來授業以公卿之子素習富貴冠服車騎鮮明華好既贄見歸三日不返諸生皆曰是豈真實為學者歟翼日君博帶褒衣執經趨席刮磨豪習凜若寒士諸生嘖嘖驚歎劉公亦甚

喜之君為學清苦聞師之言晝誦夜思至忘寢食數年
始一歸省蓋惟恐學之不及也初值父亡即能行古喪
禮三年不居于內宗族賢之父居官廉家無儲積諸兄
宦游他邦君獨養母旨甘常具母亡哀踰前喪其家益
貧日宴食或不充意泊如也榜所居室曰存齋杜門授
徒講說經訓諄諄不倦遠近學者爭歸之劉公嘗集已
所為詩百餘篇表年以命之曰丁亥集寓意深遠讀者
或弗深曉君為註釋以達其意真定安君熙通經學古

數欲謁見劉公不果君盡以所聞告之安君由是深有
發焉當是時君聲名聞海內憲府藩方薦者以十數
仁皇御極銳意古文一時儒士多不次進用當路者方
擬召君居成均教胄子而君卒矣士論嗟惜久之贈承
事郎秘書監秘書郎君祖考塔塔爾台國初帥軍民詣
界河北迎謁太祖有勅書賜名且琳沁命尊太師國王
南伐累官龍虎衛上將軍易州崇寧軍節度使行川州
元帥府事考祺初襲父官充北京路總管佩金虎符歷

尹真定彰德濟南諸郡卒官嘉議大夫河北河南道提
刑按察使有名當世三子長陝西行臺治書侍御史某
次同知息州事某季即君也祖妣李氏妣劉氏配崔氏
真定路治中德昭之女有賢行中外姻族以為表儀追
封宜人子男二人杞承事郎黃州路麻城縣尹構不仕
女二人長適汴梁路總管李經次適御史中丞董守簡
鎧之母也讀書明大旨治家有禮法知求金石之文以
彰其親賢矣哉孫男三人休勲烈女一人幼嗚呼古之

人蓋有不仕者矣或全身以避地或矯俗以干名孰能
安于義命之正審于出處之宜以求合于中庸之道者
歟若靜修先生劉公不可尚矣而烏君者能忘富貴聲
利之欲知慕高尚澹泊之樂其胸中所蘊亦豈一時之
人所能窺其萬一乎是宜序次行事揭于其墓之原銘曰
委質為臣隱約善身出處雖殊仁心則均國之四維禮義
廉恥進不由道何以曰士君退于家惟志之求善以及
人而心休休卓哉劉公君學是企凜凜高風聞者興起

焦先生墓表

先生姓焦氏諱悅字子和祖考恩金季自懷之武陟徙
真定考德行以孝行聞于鄉先生弱不好弄端重如成
人始入鄉校即知嚮學師弗煩于訓誨稍長從藜軒吳
君游吳君明經先生講求誠意正心之學君有所得自
是一言一行皆求合于規矩同游者敬而畏之不敢狎
侮焉我國家初定中土取士之制未遑仕者悉皆吏進
先生迫于親命俾習律令夜則讀書或達旦不寐嘗與

同郡安君熙講說六經之旨伊洛諸儒之訓莫不究其精微一時朋友皆自謂弗及也久之辟州佐史未幾謝去又辟為郡掾曹數月辭歸蓋先生持身廉正不樂隨俗俯仰以故退休于家奉親養之溫清甘旨盡其職執親之喪哀麻哭位合于禮三年不宿于內君子以為難家庭雍睦雖盛暑必具衣冠以見子孫子孫亦皆緝學修行先生弟恒早亡其妻趙氏守節自誓朝廷特表異之皆先生之德有以化之也豈惟家人化之而鄉閭亦

知景仰焉先生嘗曰學者將以行其學學焉而弗踐履
何以學為哉故畫之所行夕則書之其不可書者則有
所不為也鄉之先進若翰林王文恭公恕齋安先生咸
器重之燕南部使者復以憲府掌書薦亦辭不就中臺
御史表其學行可為人師遂授真定郡學官先生勉起
就職訓誘淳淳唯恐不至而學者亦樂聞其說歲餘不
出號其居曰兌齋家事不復關白詠歌詩書以供老焉
享年七十有二至元三年丁丑夏六月壬辰卒是月丁

西塋郡城之北大安鄉游家里先生之妣王氏鄒氏配
趙氏子男二鎮先卒次埜女適稿城尉劉景祖孫男二
立本治進士業次習耕女一幼昔先叅政府君與先生
交雅厚其為掾曹蓋同就辟先府君擢掾河東先生贈
言曰君行我止豈非命乎蓋安于義理類此先生既卒
六年天爵之官鄂省拜謁墓下埜以墓表為請夫以先
生潛德篤行當上太史垂範後世顧惟後學豈足以發
其萬一然不可以無言也先生始學為詩即有理趣其

詩百餘首詩講疑一編並藏于家銘曰

充乎其若虛確乎其若愚斂之以歸藏淵乎自如奉親
居喪執禮弗踰我述潛德以表諸幽墟百世之下尚徵
其為齊魯質行之儒乎噫

濮州儒學教授張君墓誌銘

吾鄉有博洽豈弟之士曰張君諱在字文在其學自六
經百家太史之籍先儒箋疏傳注之書兵家族譜方言
地志與夫萬里海外蠻夷異域荒怪之說靡所不覽既

久而能不忘屏居閭里環堵蕭然聚書萬卷誦習校讎
風暑雨寒不輟也賓客弟子經過從游有問輒應愈叩
而愈無窮然亦未嘗以自矜也其為人和平樂易孝於
宗親蚤失其父獨奉母氏家雖固窮自奉清約養生送
死必稱于禮與朋友交克盡誠款氣和色溫怡然不忍
相違也人或犯之置而不問聞人之善稱道不已人苟
有過未始一語及之嗚呼可謂博洽豈弟之士矣君世
真定稿城人幼時嘗侍諸父宦游他邦聞見益廣年二

十餘始還真定又從鄉先生侯君受業大叅王文恭公
休政家居君恒往來聽言論于左右所學益大以肆延
祐初元詔郡縣賓興多士有司以君應詔遂以春秋中
其科明年春試禮部下第時貢舉初興試者銳于一得
既而被黜者譁言不止至作詩歌譏詆主司君即日束
書而歸曰是吾所學未至也朝廷方崇尚斯文作興士
氣凡與計者偕授以校官有差君得真定儒學正具訓
諸生懇懇不倦初成均制登歌樂以祀孔子至是郡國

悉倣為之古樂廢已久憲司求能通制度音律者共議
屬君君乘傳詣餘杭稽圖制器審協音律數月完歸春
秋釋奠必奏其樂鏗鏘之音升降之節觀者悚然思見
隆古之盛矣國家既以文藝取士士之進也不雜於是
人人思奮于學而中州老師存者無幾後生或無從質
問聞君善教來學者日盛經其指授多中科名君既明
習春秋以貢舉唯許用左氏公羊氏穀梁氏胡氏之傳
然四家言義互有異同君比輯其合于經者為四傳歸

經以授學徒江南三行省每大比士多至數千人而考官必得碩儒士方厭服至治癸亥御史中丞曹公伯啟監試浙省以書幣延君遂偕宣城貢公奎江寧楊公剛中長沙歐陽公元考試其文及禮部取士浙省得人居多泰定間故翰林待制彭公寅亮屢薦君多識故事宜居史館不報乃循資調濮州教授泊然赴官振舉學職山東學子遠近至者常百餘人君晝則分經講貫夜則課習程文久之疾作或勸君宜少休則曰教吾職也敢

以疾辭乎猶講說如平時而疾益劇矣以至順二年四月廿八日卒于官舍年五十六濮之官吏及諸儒生共割俸出財為治棺槨僦車載之歸葬其鄉君曾大父某不仕父玉承事郎永年縣尹父君鐸上都留守司掾妣顏氏娶羅氏子男二人務本治進士業立本尚幼是歲六月十日葬君稿城縣張家原里人國史院編修官俊民以狀徵銘其墓天爵自總角時從親來京師間歸鄉里輒與君游每獲多聞之益嘗嘉君之賢而竟不果顯

聞于時悲夫故為之銘銘曰

維古于學貴多識匪銜才華蘊為德猗與張君資挺特
篤師古訓廢寢食興學校文臨郡國多士鼓箏樂矜式
神于君子壽何嗇石著銘章示無極

故靜觀處士劉君墓碣銘

劉氏世家上饒唐季有諱迪者仕于鄱徙居鄱之清溪
六傳曰字宗慶歷二年登進士第官至秘書丞其弟曰
定皇祐五年舉進士官至尚書吏部侍郎皆有譽聞于

世為郡望族君諱傳字芳伯秘丞六世孫也曾大父咸
大父元芝宋迪功郎父孔昭母胡氏君少學于家庭迪
功府君教誨甚嚴君讀書清苦日記千言前至元時江
東部使者柳城姚公燉按行至鄱都之名士黎君廷瑞
吳君存偕迪功府君同往造謁君操几杖以從姚公愛
其穎慧命題賦詩君援筆立成姚公嘉嘆期以遠大迪
功府君常訓子孫曰吾家歷世習詩書禮三百餘年汝
曹勉旃無墜先業君感勵奮發遂窮五經尤深于易推

明程朱之傳復輯諸儒之言以輔翼之又輯大學中庸
要語以教學者名既著聞江浙湖廣兩行省提學官各
以校官起之俱不就延祐天子賓興多士鄙之郡守首
以君名應詔君曰吾之所學各能合于主司之好乎自
是深居不出聚書數千卷討論皆造其極郡人爭具禮
幣延致於家塾而師法焉君有弟曰仁曰儀可各以所
學分教鄉邑朔望來歸深衣巍冠諸子侍列一家父子
兄弟以道義相規切若師友然視聲利泊如也君晚年

獨喜為詩雍容冲雅五言諸作深得陶韋之體佳時令節杖履徜徉清溪之上蕭然若與世相忘者中臺御史薦列其行習集賢院臣表以靜觀處士之號焉君室程氏前三十年卒終不復娶或問其故則曰獨不聞曾參之事乎後至元六年二月某甲子君以疾卒享年六十有三子男曰貞孫女尚幼某年月日卜筮君于鄱之和風南鄉苦塘原以程氏祔既葬門人程興權來請銘其言曰鄱自昔為文物之邦邇年鄉之老成若黎君吳君

皆相繼淪謝今君又亡吾黨後學小子將何所考德而問業焉余感其言為之銘曰

清溪漣漪可以樂饑劉氏來居世讀詩書遭時易代歷年三百詩書之傳獨有遺澤溪水之清可以濯纓咨爾雲仍尚保幽貞

張文季墓碣銘

張君諱綱字文季家居京師以清修博雅聞于時卒不仕終其身當至元大德間民庶晏然年穀豐衍朝野中

外號稱治平公卿大夫咸安其職為士者或退藏于家
優游文藝樂以終日而世亦高仰之此其承平人物之
美後世不可及矣君質尚爽佩服儒素讀書而不求官
治生而不謀富稍有贏餘即購鍾鼎彝器法書秘畫真
收偽除日得日奇明牕棊几布列展玩作而喜曰古人
不可見矣流風遺澤是尚有可稽焉人欲傳觀亦不甚
惜或以遺文古事求質于君君考訂辨說皆有援据可
徵非妄言以自詭者也君處家雍睦動以禮法自持齋

居深靜竹樹茂密無世俗囂紛之雜間為歌詩亦多清
婉可喜久之遂名顯京師當路者欲薦用之君不屑也
一時名公碩儒東平張公孫孔高唐閻公復汲郡王公
惲柳城姚公燧涿郡盧公贄濟南劉公敏中皆傾蓋與
君友休旬令節相帥詣君焚香煮茗鳴琴觴酒翛然娛
樂京師之人相傳以為盛事君享年五十有四以至元
二年九月十五日卒是年十月十八日葬大興縣燕臺
鄉可大里張氏霸州文安人五世祖俊生興興生福福

生瑄金季避地河南事定北歸遂徙居燕以詩書教授
學者子皞歲戊戌以經義中選著儒籍贈中順大夫兵
部侍郎娶李氏封清河郡君三子伯曰經復業進士卒
官太常檢討次綿贈集賢直學士亞中大夫李郎君也
娶劉氏二子鉉雲南行省宣使蚤卒次逢吉由國子學
正累遷太史院校書郎官第七品贈君從仕郎文安縣
尹劉氏封宜人至元元年春逢吉由芮城尹入為國史
院編修官錄君行事來請銘天爵最重儒雅故序而銘

之銘曰

去古日遠古制寢微文物聲明孰究其遺圖象鼎彝君子是寶匪以玩物稽古之道翼翼京師冠蓋塞塗豈無居人孰可與娛洵美張君惜惜大雅視利在前如棄土苴顧瞻其家圖器猶存以貽孫子永著斯文

滋溪文稿卷十四